

9297

3122

119

禮部

國子祭酒

歷代沿革

國帝曰堯命汝典樂教胄子
師氏以三德三行教國子凡國之

貴遊子弟學焉保氏養國子以道教之以六藝

六儀成主時彤伯入為祭酒國子凡國之

十始末學於齊襄王時最為老師齊尚修列大

南江富大用時可

新編古今事文類聚卷之三十一 **新集**

南江富大用時可編

諸監部

哈佛大學漢和
圖書館珍藏印

上海圖書館藏

楊氏
藏書

國子祭酒

歷代沿革

虞帝曰夔命汝典樂教胄子 **書**
周師氏以三德三行教國子凡國之

貴遊子弟學焉保氏養國子以道教之以六藝
六儀成王時彤伯入為祭酒 **戰國**時荀卿年五
十始來學於齊襄王時最為老師齊尚修列大

夫之闕而三為祭酒漢吳王濞年老不朝為劉氏祭酒漢又置博士東漢置博士十四人而聰明有威重者一人為祭酒謂之博士祭酒胡廣曰凡官名祭酒皆一位之元長古者賓得主人饌則老者一人舉酒以祭地故以祭酒為名

晉武帝置祭酒一人永嘉中又置儒林祭酒一人以社夷為之總統學中衆事宋明帝置總明觀祭酒一人齊以尚書令王儉領祭酒省總明觀齊梁號為國師陳及後魏亦曰國子祭酒北齊國子寺有祭酒一人隋仁壽元年省祭酒煬

帝大業中復置祭酒唐祭酒為大司成領六學國子太學四門律學書學算學皆以儒學優重者為之。祭酒一人從三品掌儒學訓導之政檢國子太學廣文四門律書算凡七學太子視學皇太子齒胄則講義釋奠執經論議奏京文武七品以上觀禮凡授經以諸經各為一經兼習孝經論語考于歲終考學官訓導多少為殿最宋元祐官品令國子祭酒從四品元豐正名置祭酒掌三學之教法政令崇寧置大司成一員宣和罷紹興十二年始置祭酒大元仍唐

宋舊置國子監監掌學校有國子祭酒司業監丞等員國子學太學隸焉

羣書要語

凡侍坐於大司成者遠近間三席席間函丈禮記有道之選教胄之

班李矯表

庠均義重振古所崇師貴道尊有來

攸尚匪曰蘭芷疇變入室之情不自朱藍何遷

素絲之質王儉讓國子祭酒表寶劍未砥猶乏

切玉之功美箭闕羽尚無衝石之勢况才非會

稽之竹質謝昆吾之金至於敷教東宇流化上

庠曠官何仰王延明讓國子祭酒表師氏之位

必推其能南豐文祭酒一人秩二千石掌叙錄

王國嫡庶之從次及諸宗室親屬遠近郡國歲

上宗室名若有犯法當髡以上請續漢書漢選

聰明威重者一人為祭酒總領紀綱後漢朱浮

傳今後國子祭酒司業及學官並須取有德望

學識人充唐元和勅祭酒者謂祭六神以酒酌

之也凡會同饗醮必尊長先用酒以祭先故曰

祭酒韋昭辨釋名

古今事實

司成館

唐司成館祭酒領六學皆以儒學優重者為之
祭酒堂

退之聽琴序云司業武公少儀總太學儒官三十有六人列燕于祭酒堂

佩蒼玉

晉祭酒佩水蒼玉

晉志

服朱衣

南齊何胤為國子祭酒與太子中庶子王瑩並為侍中時胤輩作祭酒疑所服陸澄博古多據亦不能定遂以玄服臨試爾後羣議乃用朱服

祭酒朱服自此始也

南史

一位元長

祭酒乃一位之元長

宋書

三世國師

梁王承好儒業轉國子祭酒承祖儉父陳皆為此職三世為國學師前代未之有當時以為榮

宋史

以几杖授

吳王濞年老以劉氏為祭酒授几杖不朝

並漢書

以安車迎

漢張安世薦蘇武明習故事奉使不辱命宣帝以

武節著名臣令朝朔望號稱祭酒甚優寵之年老
不拜迎以安車前漢

以宰相兼

唐文宗時鄭覃以宰相領祭酒又後唐天成中祭酒
闕中書奏祭酒之資歷朝所貴爰從近代不重此官
况屬聖朝須崇雅道望令宰臣兼祭酒勅崔協兼判
用同姓為

漢高祖七年自櫟陽從長安置祭酒官以序近族
故劉向元帝時周堪薦向為宗室忠直明經有行
為祭酒劉德字路叔脩黃老術少時數言事召見

甘泉武帝謂之千里駒昭帝初為祭酒丞後為祭
酒孔白六帖

盧誕人師

盧誕本名恭祖拜給事黃門侍郎魏帝詔曰經師
易得人師難得朕諸兒轉長欲命卿為師於是以
誕為儒宗學府勅晉王以下皆拜之於帝前因賜
名誕拜國子祭酒

蘇劉耆儒

建元七年高平蘇通長樂劉祥並以研學者儒通
為禮記祭酒居于東庠祥為儀禮祭酒處于南序

每月朔旦率百僚親臨講論也

崔鴻十六國春秋前秦錄

皇子問義

晉杜夷以儒學稱中宗以為丞相祭酒中與初皇子至夷舍執經問義

生徒聞喜

公遷祭酒奏儒生以為學官日使會講生徒聽聞喜曰韓公為祭酒國子監不寂寞

唐李翱撰韓文公行狀

敷陳義理

隋元善賜爵江陽郡公後遷國子祭酒時帝親臨釋奠命善講孝經於是敷陳義理兼之諷諫

上大悅曰聞江陽之說更起朕心

酬悉詰辨

趙弘智永徽中為陳王師講孝經諸儒更詰辨隨問酬悉舌無留語高宗喜悅賜絹三百疋終國子祭酒

請備學徒

晉袁瓌為國子祭酒時喪亂之後禮教陵遲瓌上疏云請得給其宅地備其學徒帝從之國學之興自瓌始也

晉史

請崇文學

蕭昕代宗時擢國子祭酒請崇文學以立教本
帝悟其言詔羣臣有籍于朝及神策六軍子弟
肄業者聽補生徒

忠正亮直

劉毅忠正亮直志尚清白為國子祭酒

清淑潛敏

劉智履德清淑秉心潛敏為博士祭酒

學行文質

賀德仁少與從兄德基俱為國子祭酒時人語
曰學行可師賀德基文質彬彬賀德仁並唐書

言舉選限

楊揚為國子祭酒上言古者卿大夫子弟及諸
侯歲貢小學之異者入太學學成然後爵之唐
興二監舉者千百數當選者十之二考功覆校
以第謂經明行修故無多少之限今考功限天
下明經進士歲百人二監之得無幾然則學徒
費官廩而博士濫天祿者也且以流外及諸色
任者歲二千過明經進士十倍

輸光學錢

劉允章為國子祭酒建言羣臣輸光學錢治庠

序宰相五萬節度四萬刺史一萬詔可

皆用故事

墨敕以方士葉靜能為國子祭酒栢彥範曰陛下始復位制詔軍國皆用故事正觀時以魏證虞世南為監以孔穎達為祭酒如靜能方伎猥下安足繼蹤前列

引皆名儒

陽嶠為國子祭酒引尹知章范行恭趙玄默為學官皆名儒冠

此人何在

孔戣元和中改國子祭酒嶺南節度使崔詠卒三軍請帥宰相奏擬皆不稱旨因入對上謂裴度曰嘗有疏論南海進蚶菜者詞甚忠正此人何在抑求之度退訪或曰祭酒孔戣嘗論此事度徵疏進之即日授嶺南節度使

終身不恨

丘靈鞠領東觀祭酒曰人居官願數遷使我終身為祭酒不恨也同上

以散地處

唐權德輿以劉秩為祭酒置之國庠似在散地

又元載秉政忌楊綰望高建言太學當得天下
名儒以清其選即拜綰國子祭酒外示尊重而
實以散地處之

能八風舞

祝欽明為國子祭酒帝與羣臣宴欽明自言能
八風舞盧藏用歎曰是舉五經掃地矣

所薦大儒

宋呂正獻公公著為祭酒以太學為教化之原
故究心經理舊制薦舉學官博士皆嚴其資格
限年齒公為論列寬其科條所薦學官如王回

吳政姜潛張載皆一世大儒王存顧臨為元祐
名臣常秩吳申黃履朱臨盛僑亦顯於世處士
程頤隱居不仕公命博士即其家敦請以為大
學正頤固辭公即命駕過之

言行錄

宜處老成

鄭穆元祐中以寶文閣待制兼祭酒每諸生請
益無間寒暑雖童子必朝服延接以禮皆尊其
經術而服其教六年請老范祖禹言穆雖年七
十精力尚強祭酒居師資之地正宜處老成願
毋輕聽其去不報於是公卿大夫各為詩贈其

行空學出祖汴東門之外觀者如堵四朝國史

無逾楊時

楊龜山先生時字中立兼國子祭酒先是吳敏
乞用時以靖太學時得召對即為上言諸生伏
闕紛紛欲忠於朝廷耳本無他意但擇老成有
行誼者為之長貳即定矣上喜曰此無逾卿者
乃亟命時入太學召諸生慰勞焉言行錄

皆推汪澥

汪澥自布衣錄天子學至為正為司業為祭酒
迄于司成官以儒名者三十年時人皆推之四

朝國史

古今文集

雜著

讓成均祭酒表

李嶠

對揚鴻休揣摩褊量獎飾踰分周惶增惕中謝

臣才不應務命實偶時非親非賢奉帷幄之侍
無藝無術備鹽梅之臣排金門而上玉堂步鴛
閣而遊鸞沼抱支離之沉痾曠密勿之繁機六
翻不任但慙於背腹四肢已頓空請於骸體分
辭榮於瑣闥仍藉寵於環林顧非席上之珍敢

辱溝中之賞况東序蟻學稱為教化之宮西膠
席門實應文章之宿論姬孔之制度談夏商之
損益方期遺典墜業有可發明豈伊曲學謏聞
所堪尸黍伏望俯停庸瘝改命耆儒則授几肆
筵還知入廟之禮褒衣博帶不濡在梁之翼

唐國子舞賦

天子歛賢才之地合禮樂之府命宗伯因四時
之宜教胄子以六代之舞惟德是務以和為主
翕左手以執籥就前軒以樹羽方將發揮五禮
張皇六詩忽投步而赴節乍整容而自持雖鏘

鏘與濟濟必庸庸以祗祗及夫鍾鼓鏗勺絲竹
宴衍音容間起干旄迭見屹然山立欻然風從
觀者如堵曷不肅雍實經國之洪範蓋訓人以
中庸且樂以平其心舞以發其貌故無大無小
是則是效宜合國之子弟實教人於忠孝其儀
不忒其德惟馨遠人由是以來之故時無違命
明神可得而禮矣故物無遁形大哉聖人其道
可久約我以禮樂弘我以孝友覩躑躑之屢舞
實循循之善誘文德温恭則羽籥在歸根之時
武士發揚則干戈居肇萌之後夫手之舞之有

小有大成童舞象弱冠舞夏並允洽於生靈良
克諧於風雅莫善於樂執而勿捨聖人若斯須
而去身則孰能垂拱於天下
詩集

楊祭酒贈項斯詩

幾度見君詩總好及觀標格過於詩平生不解
藏人善到處逢人說項斯

石鼓歌

韓愈

憶昔初蒙博士徵其年始改稱元和故人從軍
在右輔為我量度掘曰科濯冠沐浴告祭酒如

此至寶存豈多聖恩若許留太學諸生講解得
切嗟觀經鴻都尚填咽坐見舉國來奔波

元豐感事詩

朱行中

冠帶橋門路雍容俊士關微言尊靈靈小道屏
間間禮樂高千古詩書到百蠻斯文知未泯壁
水尚如環

國子司業

歷代沿革

禮樂正司業父師司成隋煬帝
大業三年於國子監初置司業一

人禮記曰樂正司業父師司成因以為名唐
置二人從四品副貳祭酒通判監事龍朔二
年改為少司成咸亨初復舊凡祭酒司業皆
儒重之官非其人不居歸崇敬授國子司業
上言司業義在禮記樂正司業正長也言樂
官之長同主此業爾雅云大板曰業按周頌詩
設業設簏崇牙樹羽則業乃懸鐘磬之簏簏
也今太學師不教樂於義則無所取請改國
子監為辟雍祭酒為太師氏司業一為左師
一為右師詔下尚書集百僚定議以聞議者

重難改作其事不行宋有同判監事同管勾監
事或帶職朝官充凡監事皆總之元豐正名
置司業掌三學之教法政令初除朱服建炎
三年省紹興十二年復置隆興併省司業不
許與祭酒並除乾道七年欲除劉焯孝宗曰
司業乃祭酒之貳並置何妨於是並置大元
仍唐宋舊置其官

羣書要語

樂正司業禮記命副儒官韓文帝

求師儒貳我成均進退作則動言

是做柳文陽城遺愛碣命樂正之官輔司成之

教往祗厥職毋使陽城韓愈之流專美前世樂
城徐盛喬制司國子之教初寮張勸制師氏之
職爾往參之曲阜行豐稷制凡六學生每歲有
業成上于監者以其業與祭酒司業試之隋志

古今事實

孔氏三世

孔穎達子志終志終子惠元三世司業時人美
之

引告諸生

凡陽城為國子祭酒引諸生告之曰學者所以

學為忠孝也諸生有久不省親者乎明日還養
者二十輩有三年不歸侍者斥之簡孝秀德行
升堂上沈酗不率教者罷之生徒斷斷皆有法
度

勤誘後生

陽僑為國子司業好學喜勤誘後生修講舍人
以為善職

當得名儒

宦者魚朝恩判國子監既誅楊綰言太學當得
天下名儒汰其選拜綰國子司業

請誦古詩

郭山惲累遷國子司業景龍中帝昵比近臣及
修文學士詔徧為伎餘臣各有所陳山惲曰無
所解請誦古詩乃誦鹿鳴蟋蟀篇未畢中書令
李嶠以近規諷止之帝嘉其直下詔褒答

嘗寫九經

張參為國子司業年老嘗手寫九經以為讀書
不如寫書

所修儀注

韋叔夏遷成均司業久視元年制自今司禮所

修儀注並委叔夏刊定 並唐書

諸生請留

陽城為國子司業直言得罪太學諸生何蕃季
償等二百人頓首闕下請留城

諸生仰服

宋施大資師點字聖與公之為司業也諸生固
已仰服公日上堂延見勉之學古且務講求治
亂之體使可為世用士論歸之 言行錄

不奏瑞芝

黃簡肅公中為司業時芝草生武成廟官吏請

以聞公不吝則陰畫以聞宰相召長貳詰之曰
治世之瑞抑而不奏何耶祭酒周公綰未對公
指其畫曰治世何用此為周退謂人曰黃公之
言精切簡當惜不使為諫諍官也

表上證義

王大寶字元龜知袁州暇日尋理舊所著述得
周易證義十卷毛詩國風證義六卷表進上謂
宰相曰王大寶所進書深得經旨其以國子司
業兼崇政殿說書召賜五品服

胡瞻庵集

古今文集

雜著

與太學諸生喜詣闕留陽城司業書

柳宗元

二十六日集賢殿正字柳宗元敬致尺牘太學
諸生足下始朝廷用諫議大夫陽公為司業諸
生陶煦醇懿熙然大洽于茲四祀而已詔書出
為道州僕時通籍光範門就職書府聞之悒然
不喜非特為諸生成戚也乃僕亦失其師表而
莫有所矜式焉既而署吏有傳致詔草者僕得
觀之蓋主上知陽公甚熟嘉美顯寵勤至備厚乃

知欲煩陽公宣風裔土覃布美化于黎獻也遂
寬然少喜如獲慰薦於天子休命然而退自感
悼幸生明聖不諱之代不能布露所蓄論列大
體聞于下執事異少見採取而還陽公之南也
翌日退自書府就車于司馬門外聞之於抱關
掌管者道諸生愛慕陽公之德教不忍其去頓
首西闕下懇恫至願乞留如故者百數十人輒
用撫手喜甚震抃不寧不意古道復形于今僕
嘗讀李元禮嵇叔夜傳觀其言太學生徒仰闕
赴訴者僕謂訖千百年不可覩聞乃今日聞而

覩之誠諸生見賜甚盛於戲始僕少時嘗有意
遊太學受師說以植志持身焉當時說者咸曰
太學生聚為朋曹侮老慢賢有墮窳敗業而利
口食者有崇飾惡言而肆鬪訟者有陵傲長上
而誅罵有司者其退然自克特殊於衆人者無
幾耳僕聞之恟駭怛悸良痛其遊聖人之門而
衆為是嗜嗜也遂退託鄉閭家塾考厲志業過
太學之門而不敢跼顧尚何能仰視其學徒者
哉乃今奮志厲義出乎千百年之表何聞見之
乖刺歟豈說者過也將亦時異人異無向時之

桀害者耶其無乃陽公之漸漬導訓明效所致乎夫如是服聖人遺教居天子太學可無愧矣於戲陽公有博厚恢弘之德能容善僞來者不拒曩聞有狂惑小生依託門下或乃飛文陳愚醜行無賴而論者以爲言謂陽公過於納汙無人師之道是大不然仲尼吾黨狂狷南郭獻譏曾參徒七十二人致禍負芻孟軻館齊從者竊履彼一聖二賢人繼爲大儒然猶不免如之何其拒人也俞扁之門不拒病夫繩墨之側不拒枉材師儒之習不拒曲士理固然也且陽公之

在于朝四方聞風仰而尊之貪言苟進邪薄之夫庶得少沮其志不遂其惡雖樂師尹之位而人實具瞻焉與其宣風一方覃化一州其功之遠近又可量哉諸生之言非獨爲已也於國體實甚願諸生勿得私之想復再上故少佐筆端耳勗此良志俾爲史者有以紀述也努力多賀

柳宗元白

上巳日太學聽彈琴詩序

韓退之

與衆樂之謂樂樂而不失其正又樂之尤也四

方無鬪爭金革之聲京師之人既庶且豐天子
念致理之艱難樂安居之閑暇肇置三令節詔
公卿羣有司至于其日率厥官屬飲酒以樂所
以同其休宣其和感其心成其文者也三月初
吉實維其時司業武公少儀於是總大學儒官
三十有六人列燕于祭酒之堂樽俎既陳殺羞
惟時醖筭序行獻酬有容歌風雅之古辭斥夷
狄之新聲褒衣危冠與與如也有一儒生魁然
其形抱琴而來歷階以升坐于罇俎之南鼓有
虞氏之南風賡之以文王宣父之操優游夷愉

廣厚高明追三代之遺音想舞雩之詠嘆及暮
而退皆充然若有得也武公於是作歌詩以美
之命屬官咸作之四門博士昌黎韓愈序之

送國子司業楊巨源序

韓退之

昔踈廣受二子以年老一朝辭位而去于時公
卿設供帳祖道都門外車數百兩道路觀者歎
息漢史傳其事後世圖其跡至今照人耳目國
子司業楊君巨源方以能詩訓後進一旦以年
滿七十亦白宰相去歸其鄉今楊與二踈其意

豈異也予不知楊侯去時城門外送者幾人車
幾兩馬幾駟道邊觀者亦有歎息知其爲賢以
否而太史氏又能張大其事爲傳繼二踈蹤跡
否今世無工畫者畫與不畫不論也然吾聞楊
侯之去丞相有愛而惜之者以爲其都少尹不
絕其祿又爲歌詩以勸之京師之長於詩者又
屬而和之不知當時二踈之去有是事否中世
士大夫以官爲家罷則無所歸楊侯始冠舉於
其鄉歌鹿鳴而來也今之歸指其樹曰某樹吾
先人之所種也某水某丘吾童子時所釣遊也

鄉人莫不加敬誠子孫以楊侯不去其鄉爲法
古之所謂鄉先生沒可祭於社者其在斯人歟

祭竇司業文

韓退之

惟君文行夙成有聲江東魁然厚重長者之風
一舉於鄉遂收厥功命守高平令制儒宮朱衣
銀魚象服以崇我之獲見實自童蒙自視雛鷇
望君飛鴻俱官於學以纖臨洪

詩集

送詹司業詩

陳后山

才難孰爲吾君惜果滿寧容我輩先熟路長驅

聊緩步百金一發不虛弦

國子監丞

歷代沿革

隋置三人**唐**一人掌判監事凡六學生每歲有業成上于監者以其

業與司業祭酒試之登第者白祭酒上于尚書禮部**宋**景祐二年孫祖德請於直講京官內差一員充監丞詔學官兼領掌錢穀出納之事元豐定制置祭酒司業掌三學之教法政令而監之事則丞與馬建炎三年省紹興

十二年復置

大元置二人

羣書要語

徙國子監丞東朝束帶銀榜增華西序繫纓環林益潤唐張燕公集

當文治之朝奉成均之職孔白六帖設屬成均

參釐政令庶事之務惟丞是司初寮除胡端平

制丞於太學胡文恭制丞於膠庠○進丞學省

○上庠丞秩○用丞庠學之榮並同上秩以學

省之丞公是行錢茂先制

古今事實

上書八千言

國朝趙忠簡公鼎為相時先是國子監丞張戒上書幾八千言自謂恐忤聖意上謂宰執曰朕孰覽之其憂國愛君之心誠可嘉朕大開言路以防壅蔽自欲賞之趙鼎不荅沈與求曰陛下如此何患不聞盡言言行錄

古今文集

雜著

丞廳連理樹賦

王履貞唐

靈臺崇崇兮洞膠輶以綿延中有珍木兮鬱森森以芊芊且學為教原丞為糾局生於學者表王

化之大同植於廳者知宦政之無曲亦所以據於德而遠於俗也樂我皇道彰我聖年依君仁義之圃對君翰墨之筵俾為我師者如斯木之一德為程曹者如斯木之相全故瑞不虛然從化而已化不在遠行之在近有善必應故得託根講隸之宇垂陰夫子之墻雜庭槐以為列偶仙杏而成行逢聖而生匪由乎日月以異取瑞為寶孰尚夫金玉其相

國子博士

歷代沿革

六國時有博士掌通古今又曰博士秦官漢因之秩北六百石

漢多

至數十人武帝初置五經博士宣帝成帝時五經家法稍增置博士一人博士選有三科高第為尚書次為刺史其不通政事以久次補諸侯太傅元始四年改博士為博士師後漢兼而存之博士凡十四人易施孟梁丘京氏尚書歐陽大小夏侯詩齊魯韓毛禮大小戴春秋嚴顏各一博士華嶠漢書曰初欲立左氏傳博士范升以為左氏淺末不宜立陳

氏乃詣闕上疏爭之更相辯對帝卒立左氏

學掌以五經教子弟國有疑事掌承問對安帝以博士多非其人詔命三公將軍中二千石舉博士各一人務得經明行高卓爾茂異

晉咸寧四年初置國子博士十五人皆取履行清淳通明典義若散騎常侍中書侍郎太子中庶子以上乃得召試梁國學博士二人置五經博士各一人魏晉宋齊並不置五經

博士至此始置

隋省國子博士至大業復置

唐國子博士二人正五品上掌教文武官三

品以上及國公子孫龍朔改為司成宣業咸
亨初復諸州府亦有經學博士一人廣文館
博士四人掌領國子學生業進士者天寶九
載置廣文館。宋國子監無博士有直講八
人熙寧改為太學博士元豐定制亦無國子
博士大觀元年薛昂乞置國子博士四員國
子正錄各二員與太學官分掌教導從之建
炎併國子監於禮部紹興三年詔駐蹕所在
因國子監量養生徒置博士二員。大元置
二人

羣書要語

博者博通古今士者辨於然否漢
官儀生事愛敬喪沒如禮兼崇載

籍窮微闡奧則保舉

東漢中興舉博士科皆郵

板狀足下出文閭為諸生之耆龜作後來之綿

絕得不思居其位者不愧其道處于職者不墮

其業乎否則來大易負乘之譏招詩人伐檀之

刺矣皮日休移成均博士書置博士之職而著

錄之生若雲開集雅之館而欵闕之學如市文

選召端師老德以為學官唐儒林傳博士不尋

章張鷟集博士師屬也韓文列於師官初寮章

毅制紬經訓胄鄭補之制宜寘博通之列胡文

恭除陳益制進遷學省充豫教官許恢等制擢

任儒林之官參司胄子之教潘夙制博通領於

儒林李希逸制成均典教葛僖制典胄之選公

是行張會制博士道之淵藪魏高采上書教學

以導世治性為時養器其置學立五經博士以

崇王化隆風俗吳志詔

詩句評事不讀律博士不尋章唐張鷟為車載

斗量之詩時沈全交於南院吟云三年國子師

腸肚蒺藜莧韓愈詩儒庠恣遊息聖籍飽商摧

漸階羣振鷺入院誨螟蛉並同上

古今事實

章甫冠

漢文帝時博士朝服玄端章甫冠通典

兩梁冠

晉置國子學博士一人介幘兩梁冠服佩同司

馬彪百官志

端委佩玉

博士之職端委佩玉朝之大典必詢度之晉中

興書

尊異服冕

博士秩卑以其傳先王之訓故尊而異之令服大夫之冕

荀綽晉百官表

八世皆為

漢歐陽歙自歐陽生傳伏生尚書至歙八世皆

為博士

並前後漢書

百年最盛

武帝立五經博士迄于元始百有餘年傳業者寔盛

被詔特命

後魏崔逸為國子博士每公事逸常被詔獨進

博士特命自逸始

北史

掃門恠問

熊安生初仕北齊為國子博士武帝入鄴安生遂令掃門家人恠而問之安生曰周帝重道尊儒必將見我矣俄而帝幸其第詔不聽拜親執其手引與同坐謂曰朕何如武王安生曰武王伐紂懸首白旗陛下平齊兵不血刃愚謂聖略為優帝大悅賜帛三百疋米三百石宅一區并賜象笏及九環金帶自餘什物稱是

論勝賜席

殷亮建武中徵拜博士遷講學大夫諸儒論勝者賜席至八九重帝用嘉之曰學不當如是耶

待詔金馬

公孫弘對策第一入見拜為博士待詔金馬

論經石渠

歐陽高為博士高孫地餘以尚書授太子為博士論石渠張山拊事小夏侯建為博士論石渠周堪與孔霸俱事大夏侯霸為博士堪譯官令論石渠施讎為博士甘露中與諸儒論五經同

異於石渠

參議禮樂

董鈞永平初為博士時卓創五郊祭祀及宗廟禮樂威儀章服並令鈞參議多見從用當時稱

通儒後漢書

遣使關東

漢成帝遣博士使關東不稱詔曰儒林之官學海淵藪宜皆通達國體故謂之博士否則學者無述焉非所以尊道德也

使行風俗

漢元鼎中徐偃為博士使行風俗偃矯制使膠東魯國鼓鑄鹽鐵還奏事張湯劾偃矯制法死偃以為春秋之義大夫出疆有以安社稷利萬民可專也湯不能屈

使錄寃獄

前漢成帝初即位孔光為博士數使錄寃獄行風俗振贍流民奉使稱旨由是知名以高第為尚書

天下宗師

後漢朱浮以國學既興宜廣博士之選上書曰

博士之官為天下宗師使孔聖之言傳而不絕

為世表領

晉元帝時荀崧上疏曰昔咸寧太康永嘉之中侍中常侍黃門通洽古今行為世表領國子博士

說書稱善

相榮年六十餘世祖召令說書甚善之每朝會令榮於公卿前敷奏經書帝稱善曰得生幾晚拜博士同上

得人為慶

貞元八年以前江西府監察御史召拜博士朝
士以得人為慶

韓愈撰權德輿墓碑

博通五經

徐文遠博通五經隋大業初許善心薦為學官
擢國子博士

考定經義

唐房昭遠為國子博士會上令國子生通一經
者並悉薦舉將擢用之既策問訖博士不能時
定藏否祭酒元善因令昭遠考定之昭遠覽筆
便下初無疑滯或有不服者昭遠問其所傳義

疏輒為始末誦之然後出其所短自是無敢飾
非者所試四五百人數目便決儒者莫不推其
通博

唐書

叔孫制禮

漢叔孫通為博士初制漢禮

漢書

賈誼通書

賈誼頗通諸家之書年二十餘文帝召為博士
年最少有詔議諸老未能言誼盡為之封人人
各如其意所出諸生於是以為能文帝悅之超
遷一歲至太中大夫

韓嬰詩易

韓嬰燕人也孝文時爲博士景帝時爲常山王太傅嬰推詩人之意而作外傳數萬言其語頗與齊魯間殊然其歸一也而燕趙間言詩者由韓生韓生亦以易授人推易意而爲之傳燕趙好詩故其易微推韓氏自傳之孝宣時涿郡韓生其後也以易微待詔殿中其所授易即先太傅所傳也嘗受韓詩不知太傅易深韓氏固專傳之

孔氏尚書

孔子之後孔忠生武及安國武生延年延年生霸安國與延年皆以治尚書爲武帝博士霸以治尚書事太傅夏侯勝昭帝末年爲博士霸生光經學尤明武帝初即位舉爲博士歷官至丞相

小戴說禮

孟卿東海人也事蕭奮以授后蒼魯間丘卿蒼說禮數百言號曰后氏曲臺記授沛聞人通漢子方梁戴德延君戴聖次君沛慶普孝公德號大戴爲信都大傅聖號小戴以博士論石渠由是禮有大戴小戴慶氏之學

張禹對易

張禹甘露中諸儒薦之有詔太子太傅蕭望之問禹對易及論語大義望之奏禹精習有師法久之乃試為博士

康衡解頤

康衡好學家貧傭作以供資用尤精力過絕人諸儒為之語曰無說詩康鼎來康說詩解人頤元帝時為博士

朱雲折角

朱雲授易頗有師道是時少府五鹿充宗貴幸

為梁丘易自宣帝時善梁丘氏說元帝好之欲考其異同令充宗與諸易家論充宗乘貴辨口諸儒莫能與抗皆稱疾不敢會有薦雲者召入攝齊升堂抗首而請音動左右既論難連柱五鹿君故諸儒語曰五鹿岳岳朱雲折其角由是拜為博士

以經著姓

京房受易梁人焦延壽房授東海殷喜河東姚平河南弘乘皆為郎由是易有京氏之學魯國先賢傳前漢施讐從田王孫受易召為博士初

丁寬從田何授易寬授田王孫王孫授施讐孟喜梁丘賀繇是易有施孟梁丘之學嚴彭祖與顏安樂俱事睦孟孟曰春秋之意在二子矣孟死彭祖安樂各頗門教授由是公羊有嚴顏之學彭祖為宣帝博士前漢書

通經奪席

戴憑習京氏易年十六郡舉明經徵試博士拜郎中時詔公卿大會羣臣皆就席憑獨立光武問其意對曰博士說經皆不如臣而坐居臣上是以不就席帝召上殿令與諸儒難說多所解

釋帝善之拜為侍中後正旦百僚畢集帝令羣臣能說經者更相詰難義有不通輒奪其席以益通者憑遂坐五十餘重京師語曰解經不窮戴侍中後漢書

論難溫恭

相榮拜博士車駕幸太學會博士論難於前榮溫恭醞籍每以禮遜相厭不以辭長勝人後漢書

詞義鋒起

王頗授著作郎尋令於國子宣授會高祖親行

釋奠國子祭酒元善講孝經與高祖論難詞義
鋒起高祖竒之超授國子博士

發揚風雅

蓋文懿武德初歷國子助教時高祖引於秘書
省學教授王公之子時文懿為博士文懿嘗開
講發毛詩題公卿咸更相問難文懿發揚風雅
甚得人之致敬

訓授道義

歸崇敬請德行純潔文詞雅正形容莊重可為
師表者委以四品以上各舉所知在外敦遣為

博士學生朝晡請益師二時堂上訓授道義示
以文行忠信孝悌睦友旬有月試時考歲貢胥
生徒及第多少為博士考課並唐書

五經並授

魏樂祥拜博士于時太學初立有博士十餘人
其學多偏不敢親授備負而已惟祥五經業並
授

為詩最精

漢文帝時申公為詩最精以為博士申公為詩
傳號曰魯詩

廣文自始

鄭虔元宗愛其才為置廣文館以虔為博士虔不知廣文曹司何在訴於宰相宰相曰上置廣文館以居賢者今後世言廣文博士自君始不亦美乎虔乃就職

經行宜充

薛廣德以魯詩教楚國龔勝師事焉蕭望之為御史大夫除廣德為屬數與論議器之屬廣德經行宜充本朝以為博士

稱九經庫

谷律那貞觀中累遷國子博淹識群書褚遂良嘗稱為九經庫

有倚席譏

李絳請崇國學士疏曰博士有倚席之譏

瘦羊博士

甄宇拜博士每臘詔賜博士人一羊有大小肥瘦時議欲殺羊分肉宇因取瘦者自是不復爭後召會詔問瘦羊博士所在京師因以為號東

觀漢記

不冠博士

漢王式爲昌邑王師昌邑廢式繫獄當死曰臣以詩三百五篇朝夕授王至於忠臣孝子之篇未嘗不爲王反覆誦之也使者以聞得講死論後徵爲博士式衣博士衣而不冠曰刑餘之人何宜復充禮官竟謝病歸

李覺講易

宋李覺字仲明遷國子博士太宗幸國子監詔覺講易之泰卦覺因述天地感通君臣相應之旨太宗甚悅改判國子監

昭賜通經

王昭素博通九經及著易論三十三篇太祖召命講易因訪以民事昭素所言誠實無隱太祖嘉之又問治世養身之術昭素曰治世莫若愛民養身莫若寡慾太祖重其言書于屏風拜國子博士

並東都事畧

轉對內殿

史越王浩爲國子博士轉對內殿將復奏曰普安恩平王皆聰明宜擇其賢者以繫天下之望高宗頷之浩退高宗目送之翌日除祕書郎兼二王府教授朝野雜記

名重朝廷

楊文節公萬里召爲國子博士上疏乞留左司
負外郎張拭黜軍器少監韓玉玉罷繇由是名
重朝廷 言行錄

古今文集

雜著

進學解

韓愈

國子先生晨入太學招諸生立館下誨之曰業
精于勤荒于嬉行成於思毀於隨方今聖賢相
逢治具必張拔去兇邪登崇俊良占小善者率

以錄名一藝者無不庸爬羅剔抉刮垢磨光蓋
有幸而獲選孰云多而不揚諸生業患不能精
無患有司之不明行患不能成無患有司之不
公言未既有笑于列者曰先生欺予哉弟子事
先生于茲有年矣先生口不絕吟於六藝之文
手不停披於百家之編記事者必提其要纂言
者必鈎其玄貪多務得細大不捐焚膏油以繼
晷恒兀兀以窮年先生之於業可謂勤矣舐排
異端攘斥佛老補苴罅漏張皇幽眇尋墜緒之
茫茫獨旁搜而遠紹障百川而東之迴狂瀾於

既倒先生之於儒可謂有勞矣沉浸醲郁含英咀華作爲文章其書滿架上規姚姒渾渾無涯周誥殷盤佶屈聱牙春秋謹嚴左氏浮誇易竒而法詩正而葩下逮莊騷太史所錄子雲相如何工異曲先生於文可謂閱其中而肆其外矣少始知學勇於敢爲長通於方左右其宜先生之於爲人可謂成矣然而公不見信於人私不見助於友跋前疐後動輒得咎暫爲御史遂竄南夷三年博士冗不見治命與仇謀取敗幾時冬暖而兒號寒年登而妻啼飢頭童齒豁竟死

何裨不知慮此而反教人爲先生曰吁子來前夫大木爲杗細木爲榑榼榱侏儒椳闌居楹各得其宜以成室屋者匠氏之功也玉札丹砂赤箭青芝牛溲馬勃敗鼓之皮俱收並蓄待用無遺者醫師之良也登明選公雜進巧拙紆餘爲妍卓犖爲傑校短量長惟器是適者宰相之方也昔者孟軻好辯孔道以明轍環天下卒老于行荀卿守正大論以興逃讒于楚廢死蘭陵是二儒者吐辭爲經舉足爲法絕類離倫優入聖域其遇於世何如也今先生學雖勤而不繇其

統言雖多而不要其中文雖奇而不濟於用行
雖修而不顯於衆猶且月費俸錢歲糜廩粟子
不知耕婦不知織乘馬從徒安坐而食踵常途
之役役窺陳編以盜竊然而聖主不加誅宰臣
不見斥茲非幸歟動而得謗名亦隨之投閑置
散乃分之宜若夫商財賄之有亡計班資之崇
庠忘已量之所稱指前人之瑕疵是所謂詰匠
氏之不以杙爲楹而訾醫師以昌陽引年欲進
其稀苓也

古詩

贈鄭虔博士

杜子美

諸公衮衮登臺省廣文先生官獨冷甲第紛紛
厭梁肉廣文先生飯不足先生有道出羲黃先
生有才過屈宋德尊一代常坎軻名垂萬古知
何用杜陵野客人更嗤被褐短窄鬢如絲日糴
太倉五升米時赴鄭老同襟期得錢即相覓沽
酒不復疑忘形到爾汝痛飲真吾師清夜沉沉
動春酌燈前細雨簷花落但覺高歌有鬼神焉
知餓死填溝壑相如逸才親滌器子雲識字終
投閣先生早賦歸去來石田茅屋荒蒼苔儒術

於我何有哉孔丘盜跖俱塵埃不須聞此意慘
愴生前相遇且銜盃

議楊綰條貢舉狀 賈至

今兩京有太學州縣有小學兵革一動生徒流
離儒臣師氏祿廩無尚獨禮部每歲擢不其謬
哉祇足長浮薄之風啓僥倖之路矣其國子博
士等望加負數厚其祿秩選通儒碩生間居其
職十道大郡量置太學館舍博士出外兼領郡
官召置生徒依乎故事如此則青青不復興刺
擾擾由是歸本矣

律詩

送國子博士令狐赴興元覲省

劉禹錫

相門才子高陽族學省清資五品官諫院過時
榮棣萼謝庭歸去踏芝蘭

國子助教 **附** 國子教授

歷代沿革

晉武帝初立國子學置助教十五
人官品視南臺御史服同博士**東**
晉孝武損為十人**宋****齊**同**梁**班第二**陳**品第

八秩六百石後魏第七品北齊置十人隋初置國子助教三人大業三年減置一人唐增置一人宋置國子四門助教大元置國子助教二人國子教授四人

古今事實

以經文授

劉執思渤海人也遷國子助教以經文授皇太子正直純厚有儒者之風北齊書

以能詩召

宋至道元年布衣潘閔對於崇政殿賜進士及

第授國子四門助教閔賣藥京師好交結上左右有言其能詩者因召見而有是命未幾復追還詔書

古今文集

雜著

國子助教薛君墓銘

韓愈

君諱公達字大順少氣高爲文有氣力務出於竒以不同俗爲主始舉進士不與先輩揖作胡馬及圓立詩京人未見其書口相傳以熟及擢

第補家令主簿佐鳳翔軍軍帥武人君為作書
奏讀不識句傳一幕以為笑不為變後九月九
日大會射設標的高出百數十尺令曰中酬錦
與金若干一軍盡射莫能中君執弓腰二矢指
一矢以興揖其帥曰請以為公歡遂適射所一
座皆起隨之射三發連三中的壞不可復射中
輒一軍大呼以笑連三大呼笑帥益不喜即自
免去後佐河陽軍任事去害興利功為多拜協
律郎益棄竒與人為同今天子修太學官有公
卿言詔拜國子助教分教東都生元和四年卒
再絕而紹祭以不墮

太學博士

歷代沿革

魏太學置五經課試之法置春秋
穀梁博士**東晉**增置國子博士十

六人謂之太學博士**北齊**國子寺有太學博

士**隋**罷國子唯立太學置博士五人**唐**增置

三人掌教文武五品以上郡縣公子孫鄭覃
請太學五經置博士祿廩比王府官**宋**元

銘曰官不遂歸譏於時身不得年又將尤誰世

再絕而紹祭以不墮

豐三年詔改國子監置講為太學博士每經
二人掌分經講授考校程文以德行道藝訓
導學者紹聖元年左司諫翟思言熙寧更置
太學博士正錄雖有朝廷特除然類令國子
監長貳薦舉以次除授元祐以來罷去試法
請自今除學官依舊法召試從之紹興置太
學博士三員 **大元** 亦置四人

羣書要語

以文學為官 南豐制 宜率勵多士
首善京師以風四方以教導為官
曲阜集 矧由辟海進陟道山 同上 往司講解

城制 賢關養士眾建師儒宜爾袞遷遂專訓導

初察制 敷學省之經 胡文恭制 置在庠講之負

同上 西域氏之教其徒日以講習決釋其法為

事吾之視太學又足以為西域氏之羞矣奚不

日戒其屬月勵其徒年持六籍日決百氏俾諸

生於聖典也洞知大曉 皮日休與博士書

詩句 先生萬古名何用博士三年冗不治 蔡天

啓為博士三年

古今事實

服大夫冕

博士秩卑以其傳先王之訓故尊異之令服大夫冕

荀悼晉百官表

比王府官

唐鄭覃既名儒故以宰相領祭酒請太學五經置博士祿秩比王府官

唐本傳

馬光升堂

馬光為太學博士嘗因釋奠高祖親幸國子學王公以下畢集光升堂講禮諸儒生以次論難皆當時碩學先剖析疑滯

德明賜帛

陸德明為太學博士高祖已釋奠召博士徐文遠淳屠慧乘道士劉進喜各講經德明隨方立義徧析其說帝大喜曰三人者誠辨然德明一舉輒蔽可謂賢矣賜帛五十疋

六儒並授

隋馬光開皇初高祖徵山東義學之士光與張仲讓孔龍竇仕榮張買奴劉祖仁等俱至並授太學博士時人號曰六儒

隋書

一時皆冠

大業初許善心薦徐文遠及包愷褚徽陸德明

魯達為學官文遠擢國子博士愷等為太學博士世稱左氏有文遠禮有褚微詩有魯達易有陸德明皆一時之冠

徵質疑滯

謝沉康帝即位議七廟迭毀於是以太學博士徵之質疑滯也晉中興書

講甚精博

唐王恭少篤學教授鄉間弟子數百人正觀初召拜太學博士講三禮別為義證甚精博蓋文懿文達皆當時大儒每講徧舉先儒義必暢恭

所說

諸生橫卷

光武起太學博士舍內外講堂諸生橫卷為海內所集後漢書

學生文名

胡安國遷太學博士學生以文自名每一篇成置錦囊中游公卿間轉囑公處之職事乃袖刺至博士舍公問所為文其人曰比為肇明取去肇明者祭酒薛昂也他日又問之對曰近真公達所公達者中書侍郎劉達也於是公鄙其為

人公爲師儒謹所好惡如此言行錄

精選博士

淳化三年楊徽之上言文士雖多而通經甚少
精選五經博士各專業教胄子此風化之本也

薦除博士

秦觀字少游元祐初蘇軾以賢良方正薦于朝
除太學博士事畧

恩錫有差

權邦彥字朝美爲太學博士徽宗幸學設幄堂
上天顏喜甚恩錫有差延見諸生命公講下武

詩言明理暢

被旨奏對

陳忠肅公瓘字瑩中爲太學博士被旨奏對論
稽古造膝之言遂明繼述之義泰陵喜所未聞
反復詰問語遂移時迫於進膳公乃引退上意
感悟約公再見有變更時事之意泰陵聖顏英
睿臣下奏對往往攝於天威少或契合公召見
遽以人所難言逆意開陳辭達義明使人主豁
然感悟由是縉紳士夫罔不欽服蘇黃門聞之
撫几歎曰吾兄東坡最善論事然亦不知出此

以書抵公歎譽甚至言行錄

古今文集

雜著

除太學博士謝陳丞相啓

呂伯恭

里閑湮沉久安分守膠庠清邃驟被詔除夫何
逖遠之蹤猶在選掄之數竊以合炁髦於萬寓
課以度程嗣絕學於六經司其訓詁名掛成均
之屬號為儒者之先於秩雖微所繫實大苟訓
迪漸摩之本曾弗玩心則呻吟佔畢之餘焉能

塞責厥職升降視人輕重如某者氣稟顛蒙志
尚踈闊定交鈇槩不知歲月之多借助韋絃未
覺悔尤之寡每因宴豫竊自揣量惟材謏故不
足俎豆英遊惟識眊故不足權衡世變繼以閔
憂之積益於寵利之踈于命義而徼求匪惟失
已飾庸虛而銜鬻又復欺人徒欲粗試於州縣
簿領之間曷敢自通於廊廟鈞陶之上忽冒除
書之及罔知拜賜之端意者槩視戚踈曲加誘
掖昇教導之任使預懷蕪廢之慚寬奔走之期
使尚有討論之暇進之以作其急緩之以俟其

成自視缺然何以領此斯蓋伏遇某官翼宣天
綽弼亮皇猷深惟封殖於丕基疇若招徠於羣獻
荆金梁鐵貢九牧以並登粵罇燕函列百工而
咸在多取或容於舛誤廣求遂逮於孱愚某敢
不紬繹舊聞研思微旨千年蠹簡儻輸毫髮之
勞一世龍門庶荅丘山之施過此以往未知所
裁

律詩

再至學省作

王介甫

平生擾擾復膠膠學省重來歲又交騎馬醉遭

官長罵讀書慚被學生嘲何爲眷戀米五斗便
可經營把一茅好買江干千箇竹待看烟雨長
春梢

除書學博士初朝謁呈時宰

米元章

半生湖海看青山慣佩笭箠攬轡艱曉起初馳朱
雀路霜華慙綴紫宸班百寮卑處瞻丹陛五色光
中望玉顏浪說書名落人世非公那解徹天關

太學助教

歷代沿革

後魏置太學助教八品中北齊國子寺有太學助教二十人九品下

後唐置太學助教上士六人。隋初五人正

九品下大業三年減為二人唐增置二人宋

置四門助教大元置四人太學助教

古今事實

李訓別與

唐李德裕太和中為平章事時文宗欲李訓為諫官德裕諫曰李訓小人不可在陛下左右文宗曰人誰無過俟其俊改德裕曰聖人有改過

之義訓天性奸邪無俊改之理帝乃顧王涯商量別與一官乃授四門助教

邢惇悅除

宋邢惇以布衣召對真宗東封還雍丘問以治道道惇曰陛下東封西祀皆已畢矣臣復何言上悅除四門助教

古今文集

雜著

凌助教蓬屋題詩序

柳子厚

儒有蓬戶甕牖而自立者河間凌士燮窮討六籍皆有著述而尤邃春秋爲儒官守道端莊植志不回在京師十二年家本吳也欲歸而不可得遂構蓬室以備揖讓之位棟宇簡易僅除風雨蓋大江之南其舊俗也所謂求仁而得斯固然歟夫厚人倫懷舊俗固六義之本羣公是以有發德之什書在屋壁余叙而引之

四門助教廳壁記 柳宗元

周人置虞庠于四郊以養國老教胄子祭統曰天子設四學蓋其制也易傳太初篇曰天子旦

入東學晝入南學夕入西學暮入北學蔡邕引之以定明堂之位焉大戴禮保傅篇曰帝入東學以貴仁入南學以貴德入西學以貴信入北學以貴爵賈生述之以明太子之教焉故曰爲大教之官而四學具焉參明堂之政原大教之極其建置之道弘也後魏太和中立學于四門置助教二十人隋氏始隸于國子而降置五人皇朝始合于太學又省至三人負位彌簡其官尤難非儒之通者不列也四門學之制掌國之上士中士下士凡三等侯伯子男凡四等其子

孫之爲胄子者及庶士庶人之子爲俊士者使
執其業而居其次就師儒之官而考正焉助教
之職佐博士以掌鼓篋榎楚之政令分其人而
教育之其有通經力學者必於歲之抄升於禮
部聽簡試焉課生徒之進退必酌于中道非博
雅莊敬之流固不得臨於是故有去而升于朝
者賀秘書由是爲博士歸於騎由是爲左拾遺
舊制以拾遺爲八品清官故必以名實者居於
其位貞元中王化旣成經籍少間有司命太學
之官頗以爲易專名譽好文章者咸耻爲學官

至是河東柳立始以前進士求署茲職天水
武儒衡閩中歐陽詹又繼之是歲四門助教
凡三人皆文士京師以爲異余與立同祖與
武公同升於禮部與歐陽生同志於文四門
助教署未嘗紀前人名氏余故爲之說而由
夫三子者始

詩集

贈敬睦助教

釋無可

禁掖人知連狀薦國庠官滿一家貧清儀都
道蓬瀛客直氣堪爲諫諍臣

新編古今事文類聚卷之三十一

新集

新編古今事文類聚卷之三十二

新集

諸監部

太府監

歷代沿革

周官太府下大夫**秦漢**以下不置然其職在司農少府至**梁**天監置

夏卿即太府卿掌財物庫藏**北齊**兼掌進器

物**後周**太府中大夫掌貢賦貨賄以供國用

屬大冢宰**隋**初與北齊同所掌左右藏及尚

方司染等署煬帝分太府寺為少府監管尚

方織染等署但管京都市及平準左右藏唐
因之卿一人少卿二人掌財貨廩藏貿易總
京師四市左右藏常平七署凡四方貢賦
百官俸秩謹其出納賦物任土所出定精麤
之羞祭祀幣帛皆總焉龍朔改太府為外府
正卿咸亨復光宅改為司府中宗神龍復曰
太府。宋太府寺判寺事一人以兩制或帶
職朝官充凡財貨廩藏貿易四方貢賦百官
俸秩皆隸三本寺但掌祠祭香幣脫巾神位
席及造斗秤升尺而已元豐改制始正職掌

掌財貨出納貿易之事凡貢賦之輸于京
師者至則別而受之供君之用及待邊費則
歸於內藏供國之用及待經費則歸于左藏
元祐三年詔太府寺置長貳餘寺監長貳互
置建炎三年詔罷太府寺撥隸金部獨以一
丞治鹺茗之質劑凡省五年而後復置大元
改寺為監置監一人少監一人丞二人掌出納
邦國財用錢穀之事管轄左右藏諸倉坊學署

羣書要語

古名少序六帖治藏之長鄭康成周
禮注天府周禮司府鄭氏談綺掌九

貢九賦九功之貳以受其貨賄之入頒其貨于受藏之府頒于受用之府凡頒財以式灋授之周禮凡萬民之貢以充府庫凡貳貢之餘財以供玩好之用凡邦之賦用取具焉同上以二法平物一曰度量二曰權衡唐百官志唐舊制天下財賦皆納於左藏庫而太府四時以數聞續通典財賦總於他官而太府司其出納非明於金穀之要不在茲選南豐集居監臨之官典出入之務唐制領貢獻於四方掌財用於五庫况當貢賦之入宜重帑藏之司同上九卿之重

參理於佐邦六府孔修頒貨于別藏常集太府卿制會帑藏出入之要修權量平校之法白集太府卿制受藏之府國用所資同上經紀有品臣子攸同楊雄少府箴

古今事實

省閱錢帛

楊崇禮開元為少卿雖錢帛充牣丈尺皆躬自省閱時以為前後無與為比擢拜太府卿時太平日久御府財物山積以為經揚卿者無不精好唐本傳

專任錢穀

楊國忠判度支元宗觀左藏庫喜其貨幣山積面賜國忠金紫權太府卿國忠專錢穀之任出入禁中日加親幸

為人嚴慤

李龍譽召為太府為人嚴慤以威肅聞

任職清白

楊隆禮任職二十年九十餘卒隆禮罷太府元宗訪其子可代父任者宰相以其子謹餘謹矜謹名皆得父清白帝擢謹矜監察御史知太府

出納並同上

古今文集

雜著

太府寺廳壁記

鄭湜

太府周官也凡邦國之賦用取具焉漢以大農領軍國之經費而少府給縣官之私養分畫與古不同故太府之官缺置卿自梁後魏始也隋唐因之實與版曹相為管鍵以制邦財國初財賄出納阜通之政頗領於三司太府所掌惟奉悅幣頒權量而已元豐治官盡循唐舊中興初

并省附於金部獨以一丞治齏茗之質劑凡省
五年而後復馬承家蓋初除也初元豐以在京
司局分屬寺監而太府局二十有四今雖頗省
猶劇於他寺以式班內外之廩稍覆其名數而
鈎磨之則諸軍諸司糧審四院屬焉頒財用於
受藏之府周知入出而會之則左藏東西兩庫
屬焉時需省官府之需以僨用物則買務屬焉
比物真賈俾從其抵則編套兩局屬焉藥石必
良以除札瘥則和劑惠民四局屬焉叙財幣以
待上之賜好則祇候庫屬焉制券之短長以通

商則鈔引庫屬焉所異於元豐者惟內藏奉宸
不外屬權貨額隸於都司蓋經財制用有不同
爾寺凡再徙面執非宜與塵暉溷今寺故勅局
也淳熙十有五年夏局罷白于朝以爲寺秋七
月乃遷閤與顯厰稱其官府寺故有題名歲久
官溢不足登載離爲三四叢猥不章不與寺稱
於是欲更營穹召叙次官氏歲月而鏡之同舍
或遷或去不果就惟曾君三復曩嘗預遷議再
除復來爲丞實終始之以成同舍之志以湜於
是寺也爲有舊移書命之記不得辭因考其泐

革繫于碑端并識遷焉紹熙元年正月四日鄭
湜書

太府寺廳壁記

耿秉

周官三百六十名存于今而職不異者太府一
官耳周制下大夫二人上士四人下士八人設
屬若是其衆非以其事繁而職重歟故鄭氏謂
爲主治藏之長秦漢迄隋併置不常上下千載
何寂寂咸無可紀也豈出內之吝僅云有司他
非所及耶抑卓偉之才偶不相值耶若曰士舉
不逮古則焉敢厚誣獨唐開元中楊崇禮任職

二十年有公清之譽性特詳密雖尋尺皆自按
省凡物經楊卿者無不精麗吾猶憾焉以其未
聞君子之大道也國初省部寺監惟以寄祿寺
則光祿太常宗正衛尉司農大理或以卿或以
貳或以丞各寓一階別設主判之官以典事惟
太府則否其職悉入三司諸案故主判之任罕
置逮元豐釐正中更多故歲久莫詳高宗中興
駐蹕臨安任職者始可以歲月考史祺孫爲題
名記實首以紹興四年然長貳丞簿區分各記
或繁或稀題續不齊僉欲易爲編年秉承之伯

臣比修玉牒恭覩 壽皇聖帝理財之訓有曰生
之者寡食之者衆為之者舒用之者疾財計安得
不匱大哉王言深知民生之不易用度之宜節秉
謂司府之官尤不可不知此適茲兼官少列舉聖
謨以語同僚謹識于題名之首其續刻則有鄭湜
為之記紹興改元正月丙辰朔耿秉記

少監

歷代沿革

後魏 孝文帝改少府為太府置少卿
一人 北齊 因之 隋 煬帝加至一人 唐

減一人貞觀中復罷龍朔咸亨光宅神龍並
隨寺改復宋太府寺同判寺一人以京朝官
充元豐正名置少卿一人以為卿之貳元祐
三年詔太府長貳並置餘則否建炎中興省
紹興四年復 大元 少監一人

羣書要語

財賦總於地官而天府司其出納
曲阜制 九賦頒受之政百貨貿遷

之法典領之任位次列卿 南豐集 出納之地眷
求惟精兼領三尚之頒以榮四至之列 白樂天

制

古今事考

（古今事實）

問孫卿年

後魏孫詔為少卿何年老對曰臣年雖老臣節

尚少北史

畏尹卿筆

尹思胤為司府少卿時侯知一亦厲威嚴吏人

為之語曰不畏侯卿杖惟畏尹卿筆唐書

（古今文集）

雜著

謝除太府少卿表周必大

將命江淮火塵星省疏榮觀闕驟亞月卿念委
寄之不移知私恩之愈厚伏念臣寒鄉晚出薄
宦卑飛叨逢籲俊之秋濫綴登畿之數粵負承
於外府旋列屬於中臺所懼汰歸乃膺臨遣給
餉坐兼於兩路空餐行及於再暮自量心計之
非長常恐使華之不稱竊思載籍具有前模流
馬木牛葛亮創蜀中之運輦車驪駕寇恂資河
內之軍彼皆值於行師尚不聞於乏事矧說劍
橐弓之後無飛芻輓粟之勤第鈎考於簿書粗
斡旋於金穀論功何有竊位則多已慚假寵於

諸郎更許參華於七寺中負梁鵠之刺徒驚晉馬之蕃此蓋伏遇 皇帝陛下大智博臨深仁徧覆灼知能否故雖遠而不遺力勸事功凡有長而必錄爰茂出綸之渥悉褒總賦之臣遂致下愚亦升少列臣敢不仰承睿眷俯竭駑才無廢前勞少助足食足兵之政更圖後效永肩惟忠惟孝之心

監丞

歷代沿革 丞於周官為太府上士之任(梁選部太府丞一人(陳因之(後魏)亦一人(後周)曰

太府上士(隋)又曰太府丞六人(唐)四人(宋)元豐改制置丞二人元符中增一員崇寧中置藥局又添丞一員宣和中省一員建炎三年罷太府寺紹興三年置二員參預寺事

元置丞二人

君羣書要語

太府掌邦國之出入而丞屬分治眾務職畧 太府受邦國之出入而

設丞屬俾預參贊欲勝是任必惟其人 國朝制唐寺丞掌判寺事凡正大朝應貢方物應陳於殿廷者皆受而進之 分紀

古今事實

置印給鈔

宋紹興初章億守太府丞措置印給茶鹽鈔引
會要

左右藏庫

使 副使

歷代沿革

周外府主泉藏之在外者內府主
良貨賄藏于內者又有職內職幣
主泉貨所入並今左右藏之職秦漢分在司
農少卿屬官有中藏府令丞各一人掌中藏

幣帛金銀貨物魏因之晉少府屬官始置左
右藏令東晉置御史九人各掌一曹有庫曹
御史後復分庫曹置外左庫內左庫宋文帝
省外左庫而內左庫直云左庫武帝復置前
廢帝又省齊梁陳有右藏無左藏後魏闕北
齊太府寺初統左右藏令丞後周有外府上
士中士二人掌綿帛絲麻錢物皮角筋骨之
藏隋有左右藏署令丞隸太府寺唐以太府
少卿知出納左藏止一五代始置宋因之庫
置使領焉太平興國二年分為二庫淳化三

年分置左右藏各二庫四年廢右併入左政
和六年修建新庫以東西庫爲名中興因仍
東西庫各以文臣監武臣同監其東幣帛絁
紬之屬在焉其西金銀泉券絲纊之屬在焉
紹興二十七年詔戶部於轄下丞簿內選一
員兼充左藏庫提轄官此提轄所由始也
孝宗即位詔將御前樁管激賞庫撥歸左藏
庫以左藏南庫爲名專一樁管應副軍期支
遣於是東西南三庫尋罷南庫大抵國家
用度多縻於贍軍四蜀湖廣江淮之賦類歸

四總領所以餉諸屯其送京者殆無幾唯閩
浙悉輸東西庫歲入以端計者率百四十萬
以緡計者率二千萬給遣稱是而大軍居十
之七宮禁百司祿賜裁三之間有非泛浩繁
之費則請于朝徃徃出內帑封樁以補所缺
監官凡五人分帑而治舊以京朝官爲之今
唯才是用故四選通得入先是四轄官外補
則爲州內遷則寺監丞亦有徑爲雜監司或
入三館者近歲望稍輕徃徃更遷六院官或
出爲添倅非曩日之比矣

大元

左右藏庫

各置使一人副使一人右藏又有支應使都
監左藏金銀珠玉寶貨錢幣右藏掌錦帛絲
綿毛褐諸道常課諸色雜物

羣書要語

外府掌邦布之入出以供百物而
待邦之用凡有法者周禮職內掌

邦之賦入○職歲掌邦之賦出並同上內庫曰

御府謝丞後漢書離珠為藏府在須女北天文

要集天積者天子藏府也同上典司國帑公是

行曹先制特陞治藏之名李緝制受藏之府國

用所資白集行裴武制

古今事實

庫藏充滿

後魏王顯謂楊固曰吾作太府卿庫藏充滿固
曰減百官之祿及藏贖悉入京藏以此充足未
足為多

貨幣山積

唐元宗召公卿百僚觀左藏庫貨幣山積

皆納於庫

唐制天下財賦皆納於左藏庫

不同諸司

狄兼暮對唐文宗封敕問不同諸司云云

召試直集賢

程文簡公琳監左藏庫天禧中詔選文學履行

召試直集賢院六一集

高科滯筦庫

韓琦監左藏庫時方貴高科多徑去為館職公獨滯於筦庫眾以為非宜公處之自若不以為卑冗職事未嘗苟且禁中須索金帛皆內臣直批聖旨下庫公奏天禧中嘗專置傳宣合同一願復舊制詔從之舊有監秤內臣一負網運至

必監秤始得交納內臣往往數日不至寶貨皆暴露廊廡遠方衙校苦於稽留公奏罷之灾傷州郡所輸物帛不如度者例猶追剥公請蠲之言行錄

太倉使副使

歷代沿革

太倉周司徒屬官有廩人倉人則其職也秦漢大司農屬官有太倉

令丞各一人文帝時淳于意為之後漢一人

六百石魏品第七晉宋齊梁陳皆然後魏闕

北齊置令丞亦隸司農所統**後周**有司倉下

大夫隋置令二人**唐**三人**宋**豐儲倉掌九穀

廩藏之事以給官兵祿食之用紹興三年改

行在省倉內鎮城倉為南倉仁和倉為北倉

監官四員並兼管幹和糴隸司農寺 **大元**

太倉隸太府監置使副各一人掌九穀廩藏

出納之事

羣書要語

也 禮記曾孫之庾如坻如京詩乃求千斯倉詩

國無九年之蓄曰不足無六年之

蓄曰急無三年之蓄曰國非其國

國廩罕蓄之九年之儲 唐策問中都儲積會要

服勞廩委公是行劉裕制 龠合升斗斛職在太

倉掌之 漢律歷志

詩句閑曹猶得醉薄俸亦勝耕唐方于寄賈司

倉詩身到瀛洲須是好官稱庾氏莫言卑何斯

舉寄錢監倉

古今事實

倉粟紅腐

漢武帝大倉之粟紅腐而不可食

天倉天困

天倉六星在婁南倉穀所藏南三星天庾積
厨粟之所天困十三星困倉廩之屬主御糧
也石氏星經

老於掌庾

宋祥符九年詔京師官年六十已上勿差監
在京諸倉時國子博士雍文載年六十五受
勅上言求免上曰京倉自受納至給畢殆六
七歲老若此輩一任則老於掌庾矣因著式
焉長編

記其姓名

梁莊肅公適景祐中監在京倉南郊赦錄朱全
忠後莊肅上疏罷之曰全忠叛臣何以爲勸仁
宗善之擢審刑院詳議官記其姓名禁中自是
遂見擢用石林燕語

酒坊

使 副使

歷代沿革

酒坊使唐官周太祖平河中得酒
工王思善造法麴酒因置法酒庫

使宋初酒坊使加內字後去之紹興八年戶
部尚書章誼議置贖軍酒庫于行在在命司

農寺丞蓋諒王之賜浙東總制錢五萬緡為
釀本其後歲收息錢五十萬緡
大元酒坊
置使副

古今事實

兼檢討官

陳居仁字安行監贍軍酒庫所糴場隆興
改元修高宗聖政兼檢討蓋異選焉周益
公集

市買司

使 副使

歷代沿革

神農始作市**周**地官有司市其屬
有質人鄠人胥師賈師司暴司稽

肆長蓋諸市官也**漢**改秦內史為京兆尹屬

官有長安市長丞**後漢**河南尹屬官有雒陽

市長丞**魏晉**因之**東晉**隸丹陽尹**宋齊**因之

梁始隸太府**陳**因之**後魏**京邑市令從五品

中**北齊**司州牧領東西市署令丞**後周**司市

下大夫一人**隋**司農寺統京市令煬帝三年

改隸太府寺**唐**因之京置東西南三市**宋**新

賣務舊曰市買司太平興國四年改至道中

廢咸平中復置以京朝及三班內侍三人監
掌和市百物凡官禁官物所需以時供納雜
賣務景德四年置掌受內外幣餘之物計直
以待出貨或準折支用以內侍及三班二人
監後亦差文武朝官紹興六年詔雜買務雜
賣場置提轄官一員 **大元**市買司置使副

羣書要語

地官司市 周禮懋遷有無化居書
日中為市致天下之民聚天下之
貨交易而退蓋取諸噬嗑易司市掌市之治教
政刑量度禁令以次叙分地而經市以陳肆辨

物而平市以政令禁物靡而均市以商賈阜貨
而行市 周禮司市凡會同師役市司帥賈師而
從治其市政掌其賣債之事 同上委權筦之務
白六帖周有泉府之官改不售與欲得 漢書以
二物平市以三賈筠市 六典太府總京師四市
平準所以遷有無和利用 同上漢武帝置平準
官籠天下之鹽鐵於京師

古今事實

奉法不避

祭遵從征河北為軍市令舍中見犯法遵格殺

之上怒命收遵主簿陳副諫曰明公常欲衆軍
整齊令遵奉法不避是教令行也上乃貸之以
爲刺奸將軍語諸將曰當遵祭遵吾舍中兒尚
格殺之必不放諸卿也

以廉自將

潘峙字德鄜提轄雜買務雜賣場嚴禁防謹次
第大官要人無敢于以私皇城邏卒挾持于紀
公按致其罪不少貸人爲公危之然公以廉白
自將其黨雖然之卒無以報也

朱文公集

論皆大計

趙粹中監行在雜買雜賣門在筦庫論當世
事皆天下大計人屬望以爲國器

不售一物

呂好問字舜從監在京雜賣場正獻公當國
任事者以公親宰相孫闕其條約不以簿領
累公公益自厲日夜治文書若有程督之者
時以樸素先天下四方貢獻一歸之有司斤
賣以佐經費吏或下其估以自私公獨漠然
不見終秩未嘗售一物

東萊集

新編古今事文類聚卷之三十二

新集

